


[Dijon]

C 97

pi



APOLOGIE
AVROY,
ET A NOSSEIGNEURS
de son Conseil. 22.

En faueur de ses Officiers de Finances,
& pour le bien des affaires
de sa Majesté.

*Discedite iustitiam moniti & non
temnere diuos.*

SIRE,
Vostre tres humble subiect & seruiteur
DVION, remonstre tres-humblement
à vostre Majesté, Qu'il y a 8. à 9 mois, qu'il
luy a pleu assembler de tous ses Parlemēs vne
Chambre de Iustice, pour cognoistre des
abus & maluersations coulées au maniment
de ses Finances, par indulgence, laps de tēps,
& durant les libertez & necessitez d'une guer-
re plus que ciuile, & qui auoient tout besoin
de correction.

Que depuis vn si long temps vos Officiers des Finances sont descrivez, & comme condamnez en l'esprit de vostre Majesté, par des delateurs, gens de rien, oberez porteurs d'abolitions, rebuts de prisons, tous signalez, fameux, ingenieusement meschans, & qu'une maudite fureur & auarice insatiable possede.

Que la delation enfin est passée en profession, l'impunité, la recompense, le secret & protection estans promis & gardez aux Delateurs, que l'antiquité toutefois a tenus pour mauuais Demons & Oyseaux funestes en vn Estat, detestez & exposez en spectacle sur vn Theatre, & indignes de sepulture, iettez aux lyons à deuorer. Bref, que supporter, escouter, ne chastier point, estoit prouoquer, D'où Martial:

Turba grauis paci, placidaque inimica quieti

Quæ semper miseras sollicitabat opes.

Tradita est Getulis, nec capit arena nocentes

Et delator habet quod dabat exitium.

Qu'en leurs liures diffamatoires, ou sans respect ils employent tout le monde, ils posent pour maxime de condamnation, qu'il suffit qu'un homme soit riche, tenu pour riche, ou qu'il viue richement, comme si estre riche & larron estoient mesmes choses, & qu'il ne fust pas possible d'estre riche par bon mesnage,

negociation, heredité, & alliance; & bref que ce fust vn crime; mais ces miserables ne sçauent pas qu'ils ne sont bons qu'à nuire & scandaliser, que les volonteze des Princes sont changeantes, & souuent contraires.

Que de ceste liberté d'accuser il s'en est ensuiuy, que vos Officiers des Finances ont esté diuersement & indifferemment persecutez & contumacez en vostre chambre de Iustice, & courus comme chiens foux, qu'ils ont vescu en continuel tremble & perplexité, n'y ayant plus d'innocence, puis qu'il suffisoit d'estre accusé : Que dedans Paris il ne s'est veu que perquisitions & emprisonnemens, à la campagne, que fugitifs & vagabonds, en vne si grande apprehension de honte & ruïne future, vn monde de familles & parentez desolées, esperduës, & comme desesperées de se voir à l'abandon, que le credit en est failly au loing & aupres, le commerce en languit tout à plat, & vos affaires, S I R E, en tomberont si bas qu'il ne se trouuera plus à l'aduenir qui les puisse releuer & vous seruir : & si les ennemis de cét estat qui le muguentt dés long temps, luy serrent les veines de tous costez font de grands fondemens, & tirent de grands aduantages de ceste desolation & mauuaise intelligence; tout leur estude estāt

de nous diuifer artificieusement pour nous mieux perdre.

Que le corps de vos Financiers en France est comme vn Centon composé de diuerses pieces & personnes, desquels les vns sont riches, accreditez, apparentez, sçauans, vail-lans, iudicieux à entreprēdre, heureux à ex-cuter, & tous nez à negocier, thesauriser & multiplier, qui souuent en nos iours, & aux plus durs temps & angoisses de cēt estat, l'ont rachapté des gouffres de la mort, qu'appau-urir & diffamer, est appauurir & diffamer le corps de l'Estat, duquel ils sont membres & resourse; mais quand par concession ils se-roient autant d'abismes & ventres qui en-gloutissent & absorbassent l'opulence de la France; le ventre n'est que les receptacle des aliments, le cuisinier de la nature qui le distri-buē à tout le corps pour sa nourriture, par ses veines & canaux, & vostre Espargne est vn Ocean en qui les riuieres dès receptes genera-les, & toutes natures de deniers ordinaires, extraordinaires viennent fondre, que puis il réepart à tous les comptables, & charges soit contant ou en papier, rescription, mande-mēt, de ce continuel flux & reflux, vos finan-ces, le commerce, le credit & accommode-mens viuent & s'entretiennent; mais quand

l'on ne les voudroit admettre dās l'Estat, non plus que l'on ne fait pour parties du corps au corps, les taches, verruës, les loupes, & autres excroissances, encores seroient-ils comptez pour autant de zero ; or vn zero qui ne faict point nombre l'enfle.

En fin de vos Officiers, les vns se sont deferez eux-mesmes pour meriter l'impunité, les autres ont esté iugez ; la plus grande partie pour éuiter les dangers & rigueurs d'une Chābre de Iustice, & r'entrer en leurs exercices, ont mieux aymé confesser vne faute que de l'excuser: cru que c'estoit estre assez criminel que de n'estre pas en l'honneur de vos bonnes graces : & pour y pouuoir r'entrer & faire leur paix, ont offert à vostre Majesté sept millions sans les reseruez, que l'on regale sur tous Officiers comptables, selon la taxe qui en a esté faicte en particulier, avec les contraintes & peines de deux & quatre sols pour liure, priuation d'office, & droict annuel, & autres comminations, s'ils ne payent quinze iours apres la signification qui leur aura esté faicte de leur taxe.

Et toutesfois, S I R E, il n'est non plus nouveau ny honteux à vn Prince de faire & commander de l'argent, qu'à vn Chirurgien de couper & de brusler. Et de long temps

l'on a comparé les Financiers aux prez & aux
 esponges, que l'on tond & exprime souuent:
 le mal n'est donc pas en la chose, mais en la
 forme, en l'excez, en l'indifference, en ce qu'
 vne souueraine iustice est vne grande iniusti-
 ce, & pource l'on tempere tousiours la iusti-
 ce de l'equité; l'on ne donne pas vne mesme
 robe à vn geant, à vn homme, & à vn enfant:
 & neantmoins vne fourmis, vn enfant, & vn
 homme, sont aussi bien animaux qu'un geant
 & qu'un elephant; mais la difference n'est pas
 numerale; mais de proportion: & pource *in*
consilio capiendō aquiratis semper ratio habenda,
& ex prescripto rectæ rationis agendum: Ainsi
 il est loisible & honorable à vostre Majesté
 de chastier les coupables, mais de conseruer
 les bōs, ou de receuoir en corps vos Officiers
 des Fināces; en l'honneur de vos bonnes gra-
 ces, à l'exemple des Atheniens & Romains,
 qui aux choses deplorées, de mauuaise & dā-
 gereuse cognoissance & consequence fai-
 soient reconciliation par le benefice de l'ou-
 bliance: & vostre Majesté imiteroit l'exem-
 ple des Roys vos predecesseurs, Henry
 III. en ses derniers Estats à Blois, & du grand
 Henry d'heureuse memoire vostre Pere, qui
 en l'année mil six cents sept, en ses plus vr-
 gentes affaires, ayma mieux emprunter de

ses Officiers, & les tondre que de les escorcher, & en exprimer la bourse & les cœurs, tant l'opinion d'animosité du Prince contre les subiects & Officiers est dangereuse, & souvent dommageable, que l'autorité & les armes sont inutiles, si l'on n'a les cœurs, que *Princeps debet abesse ab iniuria, sed etiam à suspicione iniuriæ*. Ainsi par nécessité & prudence il faut faire vne difference du coupable à l'innocent, garder vne proportion entre le crime & la peine, à quoy les Ordonnances des Roys vos Predecesseurs sur le reglement des Finances, du simple, du double, du quadruple, de priuation d'office, confiscation, punition, ont amplement, & selon les delits pourueu.

Or si nonobstant, S I R E, toutes ces remonstrances & consequences prises de la raison & experience, il plaist à vostre Majesté, que la taxe arbitrée, non en vostre Conseil iudicieusement, mais par personnes plaines d'animosité, & à discretion tienne & s'execute; qu'il luy plaise en oster le dégoust ou opprobre, & admettre vn reiglement en vos finances, l'opprobre: car il est homme fleshy & des-honoré; comme il seroit du feu & du Soleil, si l'un estoit sans chaleur, & l'autre sans lumiere; personne ne veut suruiure à soy-

mesme : estre quand l'on n'est plus, ce que l'on a esté, & c'est vne mort viuante, & porter le deuil de soy-mesme, que d'estre tué en son honneur & dignitez, & viure en sa personne, & à la misere.

Et s'il plaist à vostre Majesté d'admettre vn reiglement en ses finances, ses finances ne pourront plus estre diuerties ny prophanées, mais seront comme sacre saintes; car l'on barrera & fermera les portes & bondes, par lesquelles, cōme par inuisibilium, elles éclipsent. Vos financiers ne recidiueront iamais dans la honte, ny à la mercy de leurs enuieux & ennemis, mais viurōt en honneur & assurez de vostre bien-veillance, de leurs biens & vies. Et de ceste reformation & œconomie, il en naistra vn fond de trois à quatre milliōs; lequel, s'il plaist à vostre Majesté affecter au rachapt de son domaine, l'on en rachetera toutes les rentes que vostre Majesté & le public ont constituées en leurs necessitez & besoin sur les decimes, aydes, tailles, gabelles, maisons de Ville, & autres alienations modernes. Et bref en dix à douze ans, l'on rachetera à vostre Majesté pour six vingts millions de constitutions que doit l'Estat, qui est bien au delà de la composition que les delateurs (que vostre Majesté mesme a fait emprisonner,

comme

comme preuaricateurs) luy ont fait esperer: lors vostre Majesté & l'Estat quittes, pourra viure en millesoudier de ses reuenus & domaine, descharger son peuple des tailles, aydes, gabelles, & autres impositions, sous la multitude & faix desquelles il gemit & succombe: & bref ramener vn siecle d'opulēce & d'or: ce que ie iustificeray par demōstration mathematique & irreprochable, lors volōtairēmēt & à l'enuy, en faueur d'un reglemēt, & sans note d'infamie; tous vos Officiers des Fināces s'efforcerōt de satisfaire à leur taxe: les coupables pour la necessité & haste qu'ils auront de sortir de peine & accusation, les non coupables pour tesmoigner de l'affection à vostre Majesté, qu'ils possederont leurs charges & ames en paix: & que c'est vne grande cōsolation à vn pere de famille de laisser aux siens ses affaires mundes, & sa maison nette: & bref que les offices reuiendront en estime & à prix: autrement aujourd'huy vn pestiféré, & vn financier, sont aussi odieux & decréditez l'un que l'autre.

De ce reglement, S I R E, il y a breuet & lettres de declaration du grand Henry, desquelles vostre Majesté ne peut faire scrupule pour deux raisons; l'une que vostre Majesté autorisera & gardera ceste vnion & corps

autant qu'il luy plaira, & luy sera vtile; qu'ils seront surueillans du maniemment & actions les vns des autres, qu'ils demeureront dans le deuoir & integrité, faciliteront vos besoins, & en seront comme le promus & conduis, repertoire & ressource.

L'autre, que le propre d'un bon Prince, tel qu'est vostre Majesté, qui non seulement est sans blasme, mais encor avec toutes sortes de vertus, & né à la vertu, est de faire plustost ses officiers bons que de les chastier, qu'il faut surprendre & perdre les ennemis estrangers, mais les domestiques, les regnicoles, qui pechent contre eux mesmes, en supporter & voir les fautes en terre, comme Dieu voit les nostres du Ciel, qu'il ne voit que les yeux fermez; l'on ne se venge pas d'une puce comme l'on fait d'une beste sauvage, autrement tous les supplices qui sont aux enfers ne suffiroiēt pas à punir nos transgressions: & pour ce le Prince chastie exemplairement les fautes publiques, non pource qu'elles ont esté commises, mais de peur qu'elles ne se commettent & imitent à l'aduenir, qu'il ne semble les fauoriser par l'impunité, que nul ne presume faire par licence, ce qu'il fait par exemple: qu'en un Estat où il n'y a ny crainte de la peine, ny esperance de la recompense, tout mal abon-

de : mais les fautes particulieres & secrettes, il les doit ignorer, & en cacher la turpitude, donner du temps au repentir & resipiscence : & puis il est de certains esprits & natures comme du vin, qui bien qu'il soit poussé, ne laisse pas avec le temps & fermentation de reprendre sa premiere bõté & goust, & si rien n'empesche que deux qualitez contraires ne compatissent ensemble, qu'un tres-meschânt homme & financier ne soit tres-bon subject, citoyen, vtile & accredité, & plusieurs choses en nature, comme elles perdent vne qualité en acquerent vne autre : & pour ce le soing du Prince deuroit esire de semer de bonnes mœurs, & auoir à l'exemple des Romains vn Magister Morum, & les retenir, non tant par la multitude des supplices & contraintes, que par vne diligente & fidelle garde, par humanité, fidelité, & bien-vueillance, qui appriuoissent les cœurs les plus sauvages, comme la cruauté & les supplices les estrangent, les brutes mesmes s'adoucissent par flatterie & nourriture ; au contraire, la persecution, la douleur & la peur les transportent & met en fureur ; ainsi il les faut instituer & contenir par bonnes loix, bien-faits, & remonstrances en la modestie & prudence : ceste science estoit si familiere au grand Henry, qu'elle s'estoit na-

turalisée en luy, qu'il sçauoit vaincre soy mesme, qu'il a plus gagné de batailles, forcé de villes, captiué d'ames rebelles par sa bonté & clemence, que par armes, aussi le cousteau ne peut ny ne fait pas tout. Caton tenoit pour maxime de ne faire iamais rien forcemēt, ny vne ame genereuse & noble ne peut s'auilir, le courageux deuenir timide, & le prudēt fol: & puis le Roy commande à des hommes, qui mal volontiers s'asubjettissent, & qui tiennēt leur liberté & facultez cheres, & non à des bestes: mais quand les hommes seroiēt brutes, il n'y a animal, pour quelque doux qu'il soit, qu'il ne faille cognoistre & traicter avec art. Vne poule pour en auoir des œufs, il faut sçauoir la faire pondre, couuer, garder du tōnerre sa couuée, la guerir de la pepie. L'on renuoye les paresseux à la fourmis, le Prince à l'exemple des abeilles, desquelles le Roy est sans aiguillon: pour tesmoigner qu'un Souuerain doit estre sans fiel, qu'il y a vne grande prudence, force & industrie d'esprit à supporter les fautes d'une multitude. En vn mot, de Dieu le Roy des Roys les commandemēs & iugemens sont droicts, saints & équitables.

Reiglement des Finances.

OR, SIRE, le reiglement que ie propose à vostre Majesté, n'est pas le reiglement commun de vos Cours & Chambres; d'imposer, leuer de l'argēt, en compter: de cestuy-cy la premiere maxime est, que

de rien il ne se fait rien.

Que l'argent est le premier sang des veines d'un Estat, le nerf de la guerre, par lequel l'on acquiert, l'on augmente & conserue toute puissance; avec de l'argent l'on a des armes, des munitions, des soldats, que l'on stipendie, affermente & discipline, estant du tout impossible en un grand estat, ny de viure ny d'estre en seureté, sans guerre, faire la guerre sans solde, & personne ne guerroye à ses despens: mais de rien, & par bon mesnage naist l'opulence. Or tout le monde n'entend pas comme vne moitié est plus grande que son tout, comme vne unité qui ne fait point nombre le multiplie à l'infiny: aussi les grandes richesses ne s'amoncellent elles point tant en attirant beaucoup, & tout à soy, qu'en pardonnant & éuitant les dépenses; car il est

du fisque en vn Estat, comme de la ratte au corps, qui quand elle s'enfle, tout le reste du corps s'atrophie.

Le troisieme, d'asseurer bien ses fonds & reuenus, pour en pouuoir faire estat à temps, fuir les rabais, griuelées, & non-valeurs.

Le quatrieme, equilibrer & mesurer la despence à la recepte, n'exceder soy-mesme, ny ne demeurer en arriere; & pour ce se mesurer & cognoistre: & au lieu de seize milliōs ne faire pas estat d'en dépendre quarante-six, de peur d'estre necessité de viure, comme les poules de gratter, les rats & les souris de ronger: & bref d'alienations & moyens extraordinaires.

Le cinquieme, faire vn espargne dans l'Espargne: & qui a oreilles pour entendre qu'il entende.

Finalemēt de thesauriser dans la bourse publique & dans les cœurs: la science en est de les sçauoir apaster & vaincre, le passer des choses superflues, sçauoir faire valoir ses denrées.

Pource i'offre à vostre Majesté, s'il luy plaist de reuoquer la grace & traictez qu'elle a faits à certains peculataires, qui reiettent la turpitude de leurs fautes sur des veufves, orphelins, morts & innocens, *Contenti, sed in-*

digni lucis vsura: car apres auoir perdu l'honneur, nous ne sommes plus hommes: mais autant de troncs & charongnes, & c'est perdre l'honneur que d'estre necessité de confesser ce que l'on ne scauroit nier: or la seule gloire nous immortalise aucunement. Qu'au lieu qu'ils ont promis à vostre Majesté sept millions, de luy fournir huit millions deux cens mil liures, faire que la taxe qui est contrainte, & de difficile execution, soit volontaire, tenir compte à tous les particuliers des auances qu'ils auront faictes sur leurs taxes: & ensemble de leurs interests, auancer à Messieurs les Commissaires, que vostre Majesté nommera, les frais de leurs vacations & de mes offres, en donner bonne & suffisante caution, auancer s'il est besoin, aux cōditions du sixiesme pour les frais & exacte recherche de ce qui prouindra de la restitution du simple, que personne ne pourra estre receu à surēcherir mes offres, qu'en me desdommageant de six cens mil liures: protestant au reste, & à Dieu, & à vostre Majesté, que ie ne suis ny suscité ny poussé en cette affaire d'aucune vengeance, mais du seul bien de vos affaires, du soulagement des Officiers, & pour me deffendre de l'iniure, iniustice, & oppression que l'on me

veut faire souffrir. Exemple, j'ay maintenu
 par ma declaration à la Chambre, opposition
 & renonciation és Cours à vostre pardō, que
 ie n'estois point taxable : Mais s'il plaist à vo-
 stre Majesté & Conseil, que ie le sois par im-
 putation, & pour assister le besoin des affaires
 de vostre Majesté, ie le veux bien estre, pour-
 ueu que ce soit sans notte d'infamie, que la
 taxe faicte à mes confreres & compagnons
 d'office ne soit commune avec eux, & à l'in-
 star d'eux, ou que si l'on veut faire vne taxe
 particuliere pour moy, que ce soit sur vn pied
 certain, & non selon le vertige de quelque
 mal-veillants, que la regle en soit prise de mes
 deportements, maniment ou facultez. Si de
 mes deportements nous sommes tousiours
 volontiers tels qu'ils nous publient : & en ce
 cas ie ne demande aucune grace, & m'aban-
 donne à toute censure, & si ie n'en suis pas ca-
 pable; car qui dit vne grace ou pardon, il dit
 vne offense, & ou il n'y a point de faute, il n'y
 a point de pardon; car s'il n'y auoit point d'O-
 cean, il n'y auoit point de pilotes, ny de Me-
 decins, s'il n'y auoit point de malades, de ver-
 tueux, s'il n'y auoit point de vicieux, & si j'a-
 uois failly, ie ne veux pas suruiure mon hon-
 neur & mon bien. Pour mon maniment, ie
 n'ay jamais compté à la Chambre, que de
 deux

deux cens cinquante mil liures, & le vingtiesme ou sol pour liure, que l'on dōne aux Treforiers de la Caualerie legere, au departemēt de delà les monts : qui ne sont pour ses fraiz que douze mil six cens liures ; & voyez avec quelle multiplication en douze mil six cens liures : & en despence libellee l'on trouuera trente mil liures à quoy l'on m'a taxé, où vne harpie mesme ne trouueroit pas que succer. Pour mes facultez, ie n'ay pas vn seul poulce de terre, i'ay consommé tout mon patrimoine aux estudes, & à esleuer mes parens, ie n'ay pour tout bien que celuy de ma femme, qui est à elle & à ses enfans : si ce n'est que vous teniez vn homme pour riche qui en a nombre, qui se contente du sien, & de peu : & s'il plaist à vostre Majesté, ou au public, de partager mō bien avec moy, i'ay huiēt enfans, desquels ie luy en donneray quatre ; mais, *iustum liberorum* : le gré & la deference que l'on faisoit aux peres qui auoient engendré nombre d'enfans à la Republique, est abrogé.

Que plus, l'on m'oste tout à coup deux mil quatre cens liures de pension, treize cens liures d'appoinctemens sur l'artillerie, quatre cens liures pour mon estat de Medecin consultant, & ordinaires aux armées & à la suite, l'on me retient trois mil six cens liures pour

mes gages d'Intendant general des meubles de la Courōne, employez en l'Estat de Messeigneurs du Conseil, que j'ay financez par commādemēt de vostre Majesté, & de l'aduis de monsieur le Marechal de Chomberg, qui disoit que cette charge vouloit vn hōme entendu & curieux; tous lesquels Estats & appoinctemens le grand Henry, qui sçauoit la difference qu'il y a d'un homme à un homme, m'auoit donnez de son propre mouuement, en consideration de mes seruices, assiduez & diuers emplois, pour auoir esté à cheual dés les Barricades au siege de Pōthoise, la premiere place qu'il attaqua sous les auspices de Henry III. au siege de Paris, à la bataille d'Yury, siege de Chartres, Roüē, Dreux, Amiens, où deffunct monsieur de Villeroy, d'heureuse memoire, institua vn Hospital, qui fut le salut de l'armée, auquel ie gardois l'ordre, & auois bonne part; au voyage de la Franche-Conté: bref à tout & par tout. En toutes lesquelles occasions ie n'ay iamais fait de poltronnerie, que ie tiens pour le premier degré de vaillantise; bien sçay ie auoir esté souvent blessé, auoir perdu à Angers au voyage de la reduitiō de Bretagne, vn œil aux pieds, & faisant le seruice de sa Majesté, l'auoir traité de l'arquebuzade qu'elle receut la iour-

née d'Aumale, accompagné mōsieur le Duc de Suilly en Angleterre, mōsieur d'Alincour à Rome, en l'annee Sainte qui traitoit en qualité d'Ambassadeur extraordinaire le mariage de tres-Auguste Princesse Marie de Medicis vostre mere, à laquelle pendant ce voyage, & depuis Angers, i'ay rendu prou de ser-uices, tenant pour beatitude de pouuoir ser-uir les vertus & merites: Mais pour ne parler point du passé, i'ay accompagné vostre Ma-jesté en Bearn, à Bayonne, à Montauban, à Montpellier, & vostre Majesté ne peut igno-rer qu'à cette suite; i'ay fait cinq Hospitaux, si qu'il n'est demeuré aucun soldat ou estro-pié à l'abandon, & feray voir qu'il m'en est deu pour mes estafes & auances huit cens li-ures de reste, que seulement ie ne demande pas, aimant mieux les perdre que d'auoir la peine de les repeter, & parler à des sourds, i'ay heureusement seruy Monsieur en sa blef-sure, tesmoing le discours que i'en ay escrit, i'ay esté depuis quarante ans bien voulu, & pres de tous les Sur-intendans des finances, Messieurs d'O, de Sancy, Duc de Suilly, Pre-sident Iannin, Marechal de Schomberg, de trois grands Secretaires d'Estat, messieurs de Reuol, Villeroy, & Fresne Forget; bref ie suis vn vieux meuble de Cour & de guerre, pour

auoir tousiours esté nourry & seruy heureusement, sans qu'à la Chambre il se trouue aucune partie employee en mon nom, ou que j'aye iamais trempé en aucū party ; l'ay trouué apres tous les meilleurs esprits & curieux le bain de Bourbon Lancy, qui estoit, *sub dio*, capable de cinq cës hommes, que Henry III. qui y fut en personne, avec la Roynie son épouse, fit rechercher par tous les ingenieux & antiquaires, & que seul j'ay trouué par induction & conjectures, sur ce texte de Philander escrit, il y a seize censans : *In ciuitate Vbi ligeris est fluuius, Varijs locis erumpit vis aquæ calidissimæ, cuius præcipuâ scaturigo puteus est, qui Vbi in lacum dicitur statim per specum in publicum subdiale lauacrum deriuatur, quod plusquam quingentorum hominum est capax* ; le Niuernois, la Bourgogne, tous les lieux circōuoisins & pays qui accoururēt à cette decouuerture & nouveau miracle ; feu Aubry Medecin celebre, qui a depuis escrit des antiquitez des bains de Bourbon Lancy & Archambault, les statuts & antiquitez que i'en rapportay, les miracles journaliers qui s'y font en font foy, & sçauent comme ce fut à mes despës, que ie les ay decouuers & voulu restituer à l'antique, & en leur pristine grandeur, sans la ialousie & enuie. Et en vn autre siecle, où par-

my des gēs qui eussent fait estat d'une curieuse recherche, cette felicité, force d'esprit & rencontre eust esté estimee : mais le bien qui en est resté malgré l'enuie, est que l'on ne sort plus le Royaume pour chercher sa santé, & que c'est autant d'espargne, & d'argent que l'on retient au Royaume, qui en sortoit, de la veüe desquels le grand Henry fut tellement content & rauy, qu'il me dōna dix mil liures, que ie n'ay iamais demandez, & desquels ie rapporteray à vostre Majesté le breuet toutesfois & quantes. Et bref à force de despandre, & despence en magnificence par vne miserable & ingrate image d'industrie, excez de bonté & affectiō, i'ay acquis de la reputation: mais lors i'estois en celibat, & ne pensois qu'à plaire au Roy, seruir le public, engendrer des enfans spirituels: ie croyois qu'il estoit loisible d'engrosser & affoler de quelque genereuse cōception, qu'il n'y auoit point d'homme nay, excellent sans vn grand courage & ambition, mais i'ay trouué que la difficulté est non seulement d'en accoucher, mais de rencontrer vne bōne sage femme & des parains, *Sed heu tempora, mores, rerum vicissitudo, omnia tenui pendentia filo, atrox & impendens ceruicibus nostris bellum*, mais pource que les hōneurs & loüāges immoderez sont odieux,

c'est autre chose de se louer & de se deffendre ; & si l'on me veut corriger , que l'on me dōne vn tuteur, ou que l'on me fasse mō procez, comme à vn prodigue ou larrō, & ie n'en appelleray pas ; car au lieu que le commū des Financiers ne desrobent que le Roy & le public, *Neque enim prædationi finis Vllus erit quādiu eadem hominum natura manebit*, & s'il y a plus de vertu & de difficulté à mespriser de l'argēt, qu'à batailler ny vaincre ses ennemis, & i'ay desrobé & le temps, & ma famille, & moy-mesme, m'abandonnant du tout au public & à mes amis, & n'y a point eu depuis trēte-cinq ans ou plus, de Princes, Seigneurs, Gentils-hommes, Capitaines, ny soldats, qui ayent receu quelque infortune, qui se soit signalé, que ie n'aye officieusement & gratuitement seruy & obligé. A mes despēs, i'ay tiré de l'oubliāce & mis en vsage les bains Romians.

Or ce cabinet, ou bain prototype, ou cause de la Samaritaine sur le Pōt-neuf, que le grād Henry a doté, la Royne vostre mere daigné visiter, les Princesses d'Espagne, Piedmōt, Angleterre, & Monsieur ; gaudy, que tout Paris & les estrangers ont admiré, auquel le iour et la nuēt, tout temperamēt, le chaud, le froid, l'humide : Bref des plaisirs salutaires et sçauās sont à discretion, sans sōm ny frais, est saisi et

inventorié par monsieur le Grand, Receueur General de Paris, et Commis à la recepte de la taxe des Financiers, duquel la richesse et beauté n'est point en ce qui se void, mais en l'usage : car ie maintiens qu'il n'y a riē de bon ny de mauuais au monde ; mais que toutes choses sont bonnes et mauuaises par l'abus et l'usage, que les rudimēs de la Beatitude de la vie future, sōt et se font goustier dès ceste vie, et qu'il est loisible d'auoir les plaisirs, mais salutaires, *μετρίμα καὶ νόμιμα*, et entre autres meubles, il a saisi vn liēt d'Ebene garny richement, reuestu à la Royale de son tabernacle, vne table d'argent pesant douze cens escus. historicee de hyeroglyphiques et deuises, avec cette inscriptiō Latine, et memorial du grād Henry, *Temporibus nefandi parricidij Henrici IIII. Regum Regis Augustissimi & flagitiosorum mastigis, quo Gallia stupore dolore & ira concussa fundamenta regni conuulsa & ipsum prope extintum monumentum hoc mœroris & solatii faciendum curauit Ioannes Iunius, Φιλοσιλεύχτος*, vne Apotheque ou escritoire portatiue d'Ebene, avec cette inscription, *PANDORA, ad vsum non abusum*, et plus haut *βασιλικὸν δωρον*, en laquelle six boistes et six phioles qui y sont, avec leurs ystēciles d'or, pesent deux mil escus, et au deffous, dās vne liette, sont tous les outils

de Chirurgie, & qui plus est, des remedes iufques icy non cogneuz ny baptifez: bref le recueil de toutes mes experiences & obferuations, que ie ne croy pas que vofre Majesté, à qui elles font voüees & facrees, cōfente qu'ils foient vendus en vn encan, & tombent peut-estre entre les mains de quelque eſtrāger, qui en fera trophée. Pluſtoſt ie ſupplie vofre Majesté de les vouloir admettre en ſon Galetas des meubles; car il n'y a point de pere qui ne tienne vn Benjamin, *Senii & animi facit* pour tres-cher. Et pour cōcluſion, S I R E, ie ſupplie tres-hūblement vofre Majesté d'admettre mes cffies auātageux pour vofre ſeruiſſe de douze cens mil liures, ſi honorables à vos Officiers, qu'ils payeront leur taxe à l'enuy, aſſeurez par vn reglement cōme ils auront à viure en leurs charges, & ne recidiuer iamais: du fruiſt duquel l'on pourra en douze ans acquitter toutes vos alienatiōs; Et pour moy ie ſupplie vofre Majesté, pour toute grace, de me dōner des iuges pour arbitrer de ma taxe, informer de mon manimēt, & me faire iuſtice.

Princeps est aliquid ſanctum & diuinum mens, anima, & paſtor populorum. Sed paſtoris eſt pecus tondere non deglubere, iuſta iniuſtis potiora habere, hircos ab ouibus diſtinguere, pietati iuſtitiæ hamatis vnguibus inherere.

LETTRE

LETTRE A MESSIEURS les Officiers des Finances.

Vinculum firmissimum concordia.

MESSIEURS,
Je vous escry sans preambule, & pour toutes excuses, que c'est vne espece de parenté & fraternizer, que de professer mesme profession & charge, estre compagnons de fortune en mesme temps, mesme lieu, & pour mesme chose, aussi la loy *ἑταῖρας* *sodalitij* de compagnonage estoit si reuerée entre les Grecs, que l'on estimoit plus vn compagnon qu'un frere; l'un que la nature l'auoit donné tel qu'il estoit; l'autre l'élection & l'amour, & qu'il s'estoit voüé: & pource comme vostre confrere & compagnon d'office, j'ay escrit ceste Apologie pour le bien du seruice du Roy, pour nostre commune iustification & deffence, nous affranchir de l'iniure & iniustice que l'on reiette sur nous, l'iniure telle que l'on nous condamne pour criminels, non ouys, non iugez, & sans l'estre: Or tout ce que les ames les plus douces & faciles peuuent supporter, c'est vn reproche apres l'auoir bien prouqué & merité, autrement c'est

D

pour perdre tout respect & patience. Liniustice que les coupables, qui par leur confession ont auoüé auoir abusé des deniers Royaux & publics, nous taxent, surchargent, sont nos parties & nos Iuges, profitent de leurs fautes, nous poursuivent par rigueurs, peines & comminations inusitées, s'adressent aux veufues orphelins, aux innocens, deterrent les morts, triomphent de nostre simplicité & souffrance, plus qu'asinique & bestiale, comme si nous n'estions pas hommes, ou que l'on voulust de la nature ce qui n'est pas en la nature, & de nous l'impossible; nous faire rendre ce que nous n'eusmes iamais, & ce que nous n'auons pas. Bref, que nous fussions vêtus de cuir de buffle. Et pource que le Roy, à qui la voix publique (et la voix publique est la voix de Dieu) a conféré dès ses ieunes ans le tiltre de Iuste: sa Majesté n'a peu entendre enuelopper le iuste avec le coupable, moins pardonner au criminel, et abandonner à son auarice et fureur l'innocent, occasion que j'offre à sa Maieité; que si conformément à sa declaration, qui porte en mots tres-experts, qu'il luy a pleu cognoistre des maluersations coulees au maniment de ses Finances, pour conseruer les bons, chastier les coupables, en regler le maniment à l'aduenir; il luy plaist

reuoquer le pardon et traitez qu'elle leur a faits, de donner à sa Majesté huit millions deux cents mil liures, qui sont douze cents mil liures de plus : faire les taxes desquelles tout le monde se mescontente et crie, volontaires, auancer à Messieurs les Commissaires les frais de la taxe future, preconter, aux particuliers les auances qu'ils auront faiçtes, Et ensemble leurs interests: sur tout nous supplions sa Majesté d'un reglement, pour deux raisons, l'une affin que ses finances ne puissent plus estre prophanées, l'autre à fin que nous sçachions comme nous aurons à viure à l'aduenir avec sa Majesté, demeurer en l'honneur de ses bonnes graces, et nous comporter en nos charges: et de cette espargne il en viendra vn si grand fond, qu'en douze ans l'on en pourra racheter les debtes et alienations de l'Estat; mais ie ne sçay pas par quel malheur ou aucuglemēt toutes les propositions ruyneuses à l'Estat, onereuses aux finances du Roy, proposees par gens de paille, et desquels la pluspart sont sur le verd, sont receuës, et celles qui sont cautionnees par personnes dignes et solubles, qui se cautionnent d'elles mesmes, comme cette-cy sont abhorrees.

C'est pourquoy, Messieurs, voyez si vous

aymez mieux agir que souffrir, recevoir la loy que de la faire, demeurer dans l'infamie, dans la recidiue, dans l'incertain, que d'en sortir par vn effort de nature, interuenir, et cautiōner ces offres, ou payer vos taxes; aux conditions que nous promettons de les vous rendre des deniers qui prouieront de la taxe des coupables, Ou il n'y a que craindre, ny a que craindre, ny que perdre: car nous appellerōs toutes choses par leur nom, et comme les enfans de Noé nous descourirons la pudeur et vergongne mesme: Et de ces questions, pour les auerer, il n'en faudra point aller au Deuin: mais ie sçay bien que nous ne sommes plus hommes, qu'une fureur Sybaritique que nous possede, que Ceriti, et cōme les Prestres de Cybele, par d'esprit nous ensanglantons et chaitrons nous mesmes. Il n'y a tantost plus d'arpent de terre en France qui ne soit baigné de nostre sang, campagne qui ne blanchisse de nos os, porte, gibet ny auenuë de ville, ou vn monde de reuoltez et suppliciez ne soient attachez: le passage de nos armes est route vastité et desolation. Bref la fureur et licence peuuent et s'estendent par tout: Et qui pis est, nous sommes tenus par tout le monde pour odieux et discordans à nous mesmes, sans ordre, prudence, ny per-

seuerance, Et bref, la fable et iouët de toutes les nations: Mais à quel propos m'estudie-je à vous depeindre des maux trop publics et communs, à vous persuader, n'est ce pas assez vous prier, que de vous faire entendre la cause et la nécessité de ma priere? la cause a esté la jalousie prise et donnée du luxe & excez de quelques particuliers, la nécessité est de nous abandonner ou releuer, si nous abandonons, il faut payer comme Sauniers, et espouser vne besasse: or vne besasse vuide est vn grand faix; si nous differons, espouser vne prison pour y vser nos vies, et nos ames, si nous exilons nous mesmes, nous serons autāt de vagabōds; ouy, mais la hôte de l'exil n'est pas à celuy qui le souffre, mais à celuy qui le cause, et les biens et les maux sont seulement en l'opinion et imagination des hōmes, mais tout homme offensé, ou qui le pense estre, est plus dangereux que luy mesme; il faut donc que du desespoir naisse la resolution et grandeur de courage; Or toutes les choses qui se font avec raison et cōseil, sont aussi honorables, comme celles qui se font cōtre raison sont honteuses; Or la raison dit, qu'apres Dieu sont les Roys, lesquels on ne peut imiter, sur peine de regret et repentir, et auxquels on ne peut resister, de peur d'accroistre l'of-

fence, pource l'on tiët que le meilleur remede des injures, est de ne les entendre pas, qu'il est des Princes comme des saisons, auxquelles il se faut accōmoder et viure avec eux, comme l'on fait avec vne Maistresse ieune, belle, et glorieuse, qu'il n'y a moyen de posseder qu'en meritant, suppliant, importunant, se changeant en ses volonteiz et complexions, pour se rendre complaisant; et puis c'est vne obseruation, que toutes les choses qui se font avec prudence et attemperance, succedent heureusement: bref, si vous auiez vne goutte de mon sang, ou si vous me voulez croire, nous sauuerōs à l'accoustumee l'Estat qui periclite, aussi bien, *priuata salus publicâ incolumitate continetur*, pource entreprenons d'acquitter les debtes de l'Estat, le reglement que nous proposons, et les moyens extraordinaires que nous indiquerons y seruiron; et s'ils ne fussent, centesimons, cinquantesimons, vigesimons, decimons nos biens, et que chacun en fasse autāt à nostre exemple, pourueu que sa Majesté se vueille regler a l'auenir, ne seroit-ce pas plustost fait que d'estre iournellement tenu à tant de ventes, reuentes, alienations, creations, multiplications, supplemens d'offices; bref estre faits responsables de toutes les necessitez de l'Estat? Les Scolaistiques

disent, que d'une absurdité et cōcession il en naist vne autre, qu'à iamais il arriuera aux Fināciars, cōme au regnard d'Esopé, qui entré maigre par vn trou dans vn grenier, n'en peut plus sortir que rendant gorge, et desgraissé. Ainsi l'ō fera de nous vn Iubilé, que l'on allōgera, et acoursira à discretiō. Pour moy seul, ie puis, et offre oster la mendicité de la Frāce, et cloaques de Paris, premiere cause de la peste, de rien et pour rien, bonifier l'Estat de sept millions par an, employer tant d'ames miserables et vagabondes que l'on supplicie tous les iours, qu'il est bien aisé de conseruer et faire bōs, et en cela il n'y aura difficulté que de vouloir : car quand le Roy, ou plustost son Conseil voudra, tout le monde desirera avec eux, sinon apres cet effort, ie dis avec Hercule; O miserable vertu, si tu n'es plus qu'un songe & un nom, & nous t'auons tousiours serui & suiui, cōme reelle & corporelle; Et pour moy, Messieurs mes Confreres, ie vous supplie de pardonner à mon affection & sentiment, & apporter à cēt aduis ce que vous pourrez de facilité, & plus; & me tenir pour

Vostre confrere tres-humble, et
tres - affectionné seruiteur,
D V - I O N.

HEV pietas, heu prisca fides, an
 quo demens miseros discordia per-
 duxit quæstores? Ut iam nihil nisi da-
 mæ, præda, et fortuna ludibria sint;
 hinc animis opus est et pectore firmo,
 Regium autem est parcere subjectis, et
 debellare superbos.

F I N.

